



CONSULTA PRELIMINARA SUS ERA APROBACION D'UN REGLAMENT

Nòm provisionau dera norma: **ORDENANÇA REGULADORA DER ACCÈS MOTORIZAT TATH MIEI NATURAU EN TERRITÒRI DERA VAL D'ARAN**

Antecedents dera norma:

Dat qu'era competéncia deth Conselh Generau d'Aran ena regulacion, autorizacion e abilitacion entara circulacion motorizada en miei naturau se fondamente enes articles 21, 47, 61.1 e 62.4.e) dera **Lei 1/2015, de 5 de hereuèr, deth Regim Especial d'Aran**, atau coma enes Decrets de transferéncia de competéncias e servicis dera Generalitat de Catalunya ath Conselh Generau d'Aran; Decret 288/1997, de 31 d'octobre (DOGC num. 2518, de 14.11.1997), Decret 150/1999, d'1 de junh (DOGC num. 2906, de 09.06.1999), Decret 365/2000, de 7 de noveme (DOGC num. 3271, de 22.11.2000), e Decret 368/2001, de 18 de deseme (DOGC num. 3546, de 04.01.2002), Decret 54/2019, d'11 de març, e en encastre des convènis de collaboracion entre eth Conselh Generau d'Aran e es ajuntaments e Entitats Menores Descentralizadas d'Aran **proprietaris des montanhes e bòsqui d'utilitat publica dera Val d'Aran**, e dera Llei 9/1995, de 27 de juliol, de Regulació d'Accés Motoritzat al Medi natural (DOGC num. 2082, de 2 d'agost de 1995) e eth sòn desenvolopament normatiu per Decret 166/1998, de 8 de juliol, de Regulació de l'Accés Motoritzat al Medi Natural.

Dat qu'en aguest encastre competénciau eth Conselh Generau d'Aran aprovèc eth dia 1 de deseme de 2000 era **Ordenança Reguladora der Accés Motorizat tath Miei Naturau en territòri dera Val d'Aran**, eth tèxte intègre dera quau se publiquèc en BOP de Lleida num. 12, de 27 de gèr de 2001, BOP de Lleida num. 91, de 3 de junhsèga de 2012, e BOP de Lleida num. 166, de 28 d'agost de 2017.

Vist qu'en desenvolopament d'aguesta ordenança s'aprovèren es annèxes ara ordenança (der I ath VII), damb es corresponentes revisions annaus de tot er articulat qu'afècte ara normativa entà regular er accés motorizat tath miei naturau dera Val d'Aran.

Vist qu'era experiéncia aquerida pendent era vigéncia dera Ordenança reguladora der Accés Motorizat tath Miei Naturau en territòri dera Val d'Aran e des sòns annèxes, a motivat era modificacion ath long d'aguesti ans des corresponents tèxtes articuladi entà adaptar-les ara realitat, as cambis socials, toristics e legislatius e entà dar responsa as besonhs e problematiques restacades ar accés tath miei naturau dera Val d'Aran.

Ei per tot açò expausat, que se considèrè que cau **acordar, cossent damb er article 133.4 dera Lei 39/2015, d'1 d'octobre, deth Procediment Administratiu Comun des Administracions Publiques**, era regulacion der accés motorizat entàs zònes que presenten major problematica pera massificacion toristica e d'activitats, atau coma entà garantir era preservacion des valors naturaus e des usatges tradicionaus.



PROBLÈMES QUE SE VÒLEN SOLUCIONAR DAMB ERA APROBACION D'AGUEST REGLAMENT

Era ordenança actua, publicada en BOP num. 12, de 27 de gèr de 2001, establic er encastre generau entara regulacion der accès motorizat enes espacis naturaus dera Val d'Aran.

Aguesta ordenança a estat complementada ath long des ans mejançant diuèrsi annèxes qu'introdusissen regulacions especificques entà determinadi airaus territoriaus.

Actuaument, aguesta estructura normativa fragmentada genèrè ua complexitat excessiva ena sua aplicacion pr'amor des diferéncias entre municipis.

Atau madeish, se considèrè que cau revisar damb detalh e preveir era regulacion des aspèctes que seguissen, coma son es normes generaus e especificques de circulacion de veïculs, era circulacion d'autocaravanes e caravanes pes pistes forestaus, es normes entara celebracion de competicions esportives, era sollicitud e autrejament d'autorizacions excepcionaus, eth regim disciplinari (infraccions e sancions), es zònes damb un regim juridic especific d'accès motorizat especific (definicion de trams, autorizacions e identificacions, lòcs de parcatge obligatòri, e punts d'informacion, transport alternatiu enes zònes damb regim especific, vigéncia des limitacions), entre d'autes.

BESONH E OPORTUNITAT DERA SUA APROBACION

Era Lei 39/2015, d'1 d'octobre, deth Procediment Administratiu Comun des Administracions Publiques e era Lei 40/2015, d'1 d'octobre, de Regim Juridic deth Sector Public, a mès d'enfortir era participacion des ciutadans ena elaboracion des normes, impause, laguens deth procediment d'elaboracion de normativa, era avaloracion "ex-pòst" des normes, en tot impausar era obligacion dera avaloracion periodica entà comprovar eth compliment des objectius que se perseguissen e era adequacion as objectius actuaus.

Era prepausa dera naua ordenança se fondeja enes següents motius:

a) Simplificacion e coeréncia normativa. Era naua ordenança preten unificar en un unic còs normatiu totes es regulacions vigentes, eliminar-ne era dependéncia de multiples annèxes. Aguesta reorganizacion normativa afavorirà ua aplicacion mès clara, eficienta e omogenèa per part des operadors juridics, era administracion e era ciutadanetat.

b) Extension de bones practiques reguladores. Bèra ua des regulacions municipaus, coma es aplicades en tèrme de Naut Aran, an resultat exitososes ena proteccion deth territòri e ena regulacion der accès motorizat.

Era naua ordenança permeterà esténer aquestes bones practiques a nivèu de tot eth territòri dera Val d'Aran, en tot garantir ua gestion mès equitativa e coerenta deth miei naturau.

c) Adequacion ara normativa de rang superior. A compdar de 2001, an estat aprovades diuèrses normes estataus e autonomiques damb incidéncia dirècta ena matèria, entre es quaus cau remarcar:

- Era **Lei 43/2003, de Montes** e es sues modificacions posteriores mejançant era Lei 10/2006, de 28 d'abriu.



- Decret Legislatiu 1/2010, de 3 d'agost, peth quau s'apròve eth Tèxte Rehonut dera Lei d'urbanisme.
- Era **Lei 1/2015**, deth Regim Especiau d'Aran.
- Era **Lei 42/2007**, de 13 de deseme deth Patrimòni naturau e dera Biodiversitat, qu'establís es principis generaus de conservacion dera biodiversitat, pera quau se creen instruments de planificacion ambientau e regule eth Hilat Natura 2000.
- Normativa europea restacada ara Directiva d'Abitats (92/43/CEE) e Directiva d'Audèths (2009/147/CE).

Aguestes normes an refortit es exigéncies en matèria de conservacion, ordenacion forestau e competéncies des entitats locaus araneses. Era naua ordenança s'a de redigir en consonància damb aguestes disposicions entà garantir-ne era sua validitat e aplicacion efectiva.

Tanben cau auer en consideracion es regulacions derivades des PEIN (Plan d'Espacis d'Interès Naturau) e des plans de gestion deth Hilat Natura 2000, atau coma es normes especificques sus fauna e flòra protegides regulades pera normativa autonòmica e estatau.

d) Incorporacion de critèris ambientaus actualizadi e figures de proteccion. Era naua ordenança se fondamente ena evolucion des critèris ambientaus e en besonh de preservar era riquesa naturau dera Val d'Aran, especiauments per çò que tanh ara sua nauta sensibilitat ecologica e ara preséncia d'espacis naturaus de naut valor.

Eth territòri aranés compde damb multiples figures de proteccion ambientau, entre es quaus subergessen es **espacis Hilat Natura 2000**, es **espacis deth PEIN (Plan d'Espacis d'Interès Naturau)**, es **Resèrves Naturaus Parciaus**, e es **Zònes de caça controlada**

Aguesta ordenança s'a d'adaptar as critèris modèrns de sostenibilitat e proteccion deth miei, damb ua especiau atencion ara biodiversitat, as risqui naturaus (com es incendis e es lauegi) e era promocion des formes de mobilitat sostenibla.

Tanben se prevé era implementacion de mecanismes de contròtle, autorizacion e seguiment adaptadi as usatges intensius e creishents deth territòri damb finalitats toristiques, esportives e culturaus.

OBJECTIUS DERA ORDENANÇA

Era elaboracion d'ua naua ordenança ei ua mesura essenciau e justificada entà garantir ua regulacion clara, eficienta, adaptada ara realitat territoriau e en linha damb es exigéncies ambientaus e juridiques actuaus.

Aguesta ordenança a de garantir qu'era regulacion der accés motorizat sigue pleament compatibla damb era conservacion deth miei naturau, en tot aplicar eth principi de precaucion ambientau e eth de sostenibilitat territoriau. Ath delà, se vò incorporar mecanismes adaptatius e tecnologicqs que permeten un seguiment actiu der usatge deth territòri, era emission telematica d'autorizacions e era diferenciacion entre veïculs particulars, servicis publics, activitats tradicionaus e usatges toristics, entà garantir ua gestion flexibla mès tanben rigorosa deth miei naturau.



Aguesta iniciativa supòse ua oportunitat entà actualizar er encastre normatiu, refortir era proteccion des valors naturaus dera Val d'Aran e milhorar era gestion des espacis d'interès naturau.

POSSIBLES SOLUCIONS ALTERNATIVES REGULADORES E NON REGULADORES

Non se preven d'utes possibles solucions alternatives reguladores que non siguen es previstes en aguesta ordenança.

DATA FINAU DERA CONSULTA PUBLICA

Quinze (15) dies obrants a compdar dera publicacion dera consulta ena sedença electronica deth Conselh Generau d'Aran.